

頤堂先生文集

頤堂先生文集

卷第一

古賦

荆玉賦

後賦

朝日蓮賦

醉竹賦

吊屈原賦

卷第二

古詩

監樂堂 并序

銅馬歌

葛仙化 王勃故事詩人未有及之者

大隋山

曲尺山靈居寺 道方長老云蚤來鍾自鳴者三極異之因引仙

都鹿事求一言記之

讀王尼傳 并序

風蓬蓬二首贈范德承

贈王先生 并序

前年一首投贈劉荊州 銑

贈趙當可

張元舉惠江南李王帳中香

范元通見和仍邀再賦

李彥澤從余求衛公兵法

得孫以詩邀立夫兄次明丈作看客

次韻子春

宿毗沙院諸友相送

戲王和先張齊望

次韻韶美義夫兩家舉孫

次何子應登賦樓韻

以朝鷄送樊氏兄弟效魯直體作兩絕

卷第三

古詩

李仲高石君堂

招隱亭

任氏園二詠

王氏碧鷄園六詠

宿崇德祠下望青城諸山

淨明長老睡庵

懷安光孝寺觀空軒遺圓長老

置酒登賦樓觀月立夫有詩序別次韻
九日同韶美誼夫登妙明分韻得光字
呈蘇企道漢良呂默夫

次韻李士舉文感春

次馮申之遊靈泉韻

李安撫生日

范漕生日

中秋大雨

遊空山

遊雲靈觀

遊靈泉呈性老

再遊雲靈

遊樊氏阡分韻得事字

再次韻

閬州新井縣豐山鎮慈光院殿柱有咸
平三年冠萊公書海棠花絕句云喧風
花雜滿欄香盡日幽吟嘆異常翻笑牡
丹虛得地玉階開落對君王近歲邑令
剗取墨跡寘邑之廳柱今獨石刻在
大雷雨中舟過蒼溪懷杜子美

次韻次尹俊卿梅花絕句
往成都八客餞飲得同字
與諸友遊楊氏池上呼王隱居小飲晚
登書臺

卷第四

古詩

山鷄送范元通

送王逸

送雍堯咨遊青城

送胡康老

送普州守

用舊韻送普守赴闕

送何熙載之官鄰山因簡虞并父

効東坡送顧子敦體送趙子功令資陽

同誼夫國才餞季然于普門院取壁間

五字詩各探一句爲韻賦五詩某得共

飲碧苔畔

贈瑄上人

送緣庵主

送元思師

次韻子應同遊靈泉

次韻子應遊鶴鳴

次韻李士舉丈除夕

次韻呂閬州錦屏之集

次韻荅張廼直

次韻許唐臣丈

次韻任元受除夕

次韻荅趙之源仍簡演師

次韻諸公贈將官鹿浩然

次韻馮舜陟見贈

次韻趙當可

次韻顧次鳳

和唐山叟所贈三詩

次韻米太初

和榮安中二絕

次昭覺圓老韻

次韻日新見招

次韻師渾甫

次韻何子應留詩爲別

次韻晁子與

再次韻

遊靈泉次性老韻

趙和之自鶴鳴泛舟歸城次韻

趙成甫招飯次默夫韻

答戴時行

答李知幾

次韻馮廷式西山紀事

次韻馮廷式

顧堂先生文集目錄

頤堂先生文集卷第一

姪

古賦

荆玉賦

卞和秉耒荆山耕獲玉璞喜曰天降異物非賤

者有蓋歸主君為國鎮守占協龜筮謀洽妻孥

宿春撰目脂轄問塗百里一飽十舍一休前持

後負雉門是求以獻厲王

記卞和事者五家轉非子謂初獻厲王厲

鹿獻武王武薨獻文王轉戰國公子言近事可
信十二國史唐人所集亦因轉書也紛紛冒死其
弟熊通執紛紛冒之子而代立是為武王史記諸
書皆不名紛紛冒為厲王然楚稱王起於熊通疑

是熊通既自王因亦追王之既殺其子因加其父
隘所謂惡之以自信者轉似得之楚橋机而史
記失其傳耳或曰厲王即蚡冒之子也無所考
據劉向新序作厲武共厲至共七君卞和已百
餘歲不可信蔡邕琴操作懷平荆平乃懷九世
祖懷之後曰頃襄王曰考烈王今世次謬妄不
足信許慎注淮南子作文武成許王使玉尹相
又居蔡後不足信今獨取韓非子之曰石也飾偽罔上罪死莫贖執畀獄士則其
左足厲棄群臣武臨江漢儲銳再獻右趾亦斷
步趨廢矣志念匱矣坐胥斃矣無復恃矣丈王
承序政令從新抱璞哀號越三夕晨淚盡血續
目枯如焚王聞而反之曰國中刖者衆子獨過
悲何也且先君重於剖石輕於刑人吾其不然

試爲子辨於是追師理璞潛寶遂出旣磨旣礪

名以和氏之璧命有司賞宜亟賜衣幘拜爵秩

頒金幣授田宅和甫伏辭避不敢即也十二國史曰謝

和而重賞之琴操曰封因進說曰玉居山則木

潤居水則流方浮青氣吐紫光天性自然不可

掩藏必其呈露寸短尺長黑如純漆白同豬肪

鷄冠擬赤烝栗比黃然後能色題瓊瑤器題圭

璋何用目之不詳哉凡今衆目侍列中外才伸

於用理不得晦雖時有就琢尚隱石者多倍勤

主君以研慮將取之如拾塊且又有請焉我先

熊繹受封荊蠻至蚡冒十六葉民順神聽基本
已固乾陽之氣在王爲具刀錯可攻棄之弗顧
武王雄心厭處南藩連兵侵隨巧圖自尊鄭絞
州蓼奮起如雲亦又失割幸乃得存主君都郢
獵申俘蔡殪息與鄧楚邦始大美矣斯璞發見
符彩臣實刑餘敢逃錫賚事貴明驗賞非所愛
和罷歸荆父老嘆曰卞子捨屨求踊忠甚効而
計則違矣石有韜玉人有蓄奇善價少諧韞櫝
莫窺售者但已韞者未虧高士恥於自鬻如彼
又焉知之

後賦

趙惠文王得楚和璧秦昭王聞之發使奉牘用
十五城兩易蘭相如曰秦強趙弱其可不許且
請報聘西面而去尺土不償全以返轂陵之路
約車治行晝日出祖望諸君樂毅謂王曰相如
習機權鑒情僞銜命疆外宜無廢事雖然王有
妖孽主者所忌和再以斲其足始作楚子之瑞
方謹藏於郢府又焉得此遐棄越黃流之廣深
徙禍本於吾地幸暴秦之肆貪鼓饒吻以奔餌
當垢滌而糞除啓羸氏之顛躓夫一璧微器也

連城重寄也賈直懸隔得失不類謀國者若此
醉寐乎趙使納關秦壘不割其計誕果於授地
規後必取其計悍浪起兵端誘吾孰應其計嫚
酖毒不可嘗虎兕不可玩捐壁辭城是謂長筭
遇彼欺奪猶得十半昔在唐虞三代以來尊則
禮天卑則問士羨以起度濫以嬰祭是朝是享
子穀男蒲贄見勞貺儀法甚都叔末道衰物與
凶隨懷之越鄉匹夫自危杼有拱者以戮其尸
戎有大者以幽其妻周穆飾臺徐戎畔之鄭伯
假田魯史諱之晉遺取虞荀息請之申挾奔鄭

濤塗殺之許男降楚面縛銜之楚繼滅賴賴子
效之舅犯要君晉文投之齊侯敗北韓厥進之
襄沒楚宮仲帶竊之師襲衛境智伯先之遠窺
近察有則不祥君王其審思哉惠文曰秦趙方

睦

惠文即位未嘗與秦交兵十四年樂毅將趙

魏

秦共韓魏燕兵攻齊與秦會中陽十五年與韓

擊

齊蘇厲遺趙王書於是趙報謝秦不擊齊秦

始

怨趙易璧事藺生甚健相國止矣徐規其變

在

十六年前也殺謀不合相如竟成命而歸自後西甲歲出雷

駭

漳濱邯鄲不守璧遂入秦

十七年秦拔我石城

又

明年來攻斬首二萬更爲璽章篆刻無倫廟

趙

奔命不暇以至亡

中所受軹旁所陳璽材之餘存為漢珎岌岌路

寢華帶輝春

張懷瓘書斷曰始皇以和氏之璧為璽使李斯書其文可謂傳國

之傳實百世之法武史載趙高令子嬰齋當廟見受王璽子嬰知高因廟中殺已稱病不行高

來遂殺之齋宮沛公至灞上子嬰奉天子璽符降軹道旁三輔黃金圖曰未央宮因龍首山制前

殿至孝武以黃金為璧帶間以和氏珎風至其璽珎戰國策曰李父送蘇秦明月之珠和氏

之璧允惠文初相也雖專政必不以趙所寶資遊說之士蘭相如在允死後允既以送蘇秦豈

復有璧可易蓋甚美必甚惡亦尤物之移人蠱城今不取

一時以爭奪閱百世之故新况寶之者殃及其身

朝日蓮賦

并引

朝日蓮似蓮而小花之外有四萼隨日出沒舊

說朝東暮西者妄也感而賦之

蓮之種夥矣僊峰十丈禁池千葉花之駢幹之
接斗之披珠之結留大家之嚴蹕下衆靈之絳
節蕩漢女之輕漿開吳娃之笑頰雖含芬吐秀
雲布星列曾未睹夫殊絕者也相彼小芳亦其
族徒寄清冷之赤水涵微眇之寸軀氣奪蘭茝
色比瓊琚金蘂中峙綠萼外郭恍朝夕之異變
顯晦隨於日車若夫日外腸谷至于曲阿則花
舒萼開亭亭浮波迎風窈窕照影婆娑日回女
紀顛于連石則花斂萼閉萼萼而沒煙水四暝

杳無遺迹初疑宓妃容與洛濱又似曹娥銜冤
自沉仰止子陵江瀬之曲忽悲靈均葬於魚腹
曉而望之晡而察之未有所不同日之起伏也吾
意夫川后河伯之倫發竒露珎以警世矇懼夜
半有負走者復收拾於貝闕珠宮不然握權執
機真有化工也顧天壤之內恢詭譎怪糾錯不
同鉅者林林細者叢叢豈耳目之能窮哉惟其
妙用莫詰動靜相時利欲昏醉人或反之身隕
名滅此花所嗤識諸座右以當箴詩

醉竹賦

俗說五月十三日竹醉移徙無不生者予以是日取東園竹數本植堦除下客至評子因次第酬荅之辭作醉竹賦

異哉竹君豈有杖頭百錢公田二頃抱甕比鄰投轄深井誰者觴之久而未醒醺然氣色頽然項領偃者如倒止者如寢振籟者如號呶搖柯者如踔躡解籜者如絕纓墮葉者如毀衽狼狽顛蹶無復修整隨人西東不得自逞雖虛心其何用顧大節之徒秉晦叔曰嘻客言可哂也林下七賢之酣放溪濱六逸之酩酊旣已神交此

君期方軌而並軫窮年卒歲坐守孤凜忽朱明
之煩溽作河朔之痛飲廢太常一日之齋適無
功醉鄉之境惟標韻之蕭散蕩然合乎天隱俾
墜車而無傷況易地以爲窘且夫萬生芸芸朝
榮夕賈獨幹質之森拔配松官以悠永聆桃李
而增欵睨蓬蒿而下憫付之一醉嘯風舞影此
竹君之妙趣何客之不省也

弔屈原賦

鑒先民之典記兮騷三閭之幽芬涕潑潑以賈
冊兮恫忠潔而不伸豈天監之沕默兮將楚祀

之邁也勲績罔究毫末兮遽蒙斥而湮淪粵權
輿之神化兮畀斯人以靈智胡廓落之巨邦兮
庸子紛其一揆邈先生之修能兮踔群曹而特
異奉渥德以專衡兮願委質而自試妍蚩錯以
相形兮爲衆情之攸忌蓋三五之盛際兮賢駿
登於玉除前唱而後和兮蕩皇澤于八區嗟獨
力之榮榮兮莫有助於持扶乃肆讒以媒孽兮
實厭私之是圖謂靈脩之下燭兮返信受以予
怒辱及身而國阤兮惛不識其所措旣前王之
不諫兮尚後王之可追鬱中情之紆兮負玷黜

以長違託叮嚀之嘉言兮鏘瓊珩與瑤珮念皇
輿之顛覆兮悼日月之不再持大義以自植兮
肯變度而易態曄四顧其何適兮寧投軀於江
瀨嗟先生之耿光兮貫宇宙而愈章世或操其
異說兮疑先生之罹殃惟屈氏之於楚兮偕高
陽之苗裔歷九州而從仕兮諒非予之夙志雖
屏棄而日遠兮猶飛心於華軒眎故都之將頹
兮忍靜默以自全懷先生於久遠兮念叔世之
愈薄小不能死封疆兮大不能死社稷習柔媚
以圖安兮睨其君如國人進靡聞於抗直兮矧

退爲之隕身抑高風之難嗣兮獨以是鍾于先
生豈時變而事殊兮孤忠無用於必行死骨之
不可作兮浩悲思之來并系曰山峻峻兮水濶
濶沅湘春兮洞庭秋繽紛兮芰荷衣容與兮木
蘭舟馮夷兮導前祝融兮馳殿揖彭咸兮周旋
招申徒兮遊行晨謁帝兮九疑夕騰步兮南箕
肱溷濁兮高逝倏千載兮不歸

頤堂先生文集卷第一

乾道壬辰六月王撫幹宅謹記

頤堂先生文集卷第二

姪

古詩

監樂堂并序

巴川郡治之圃曰監樂堂者紹興戊辰始勑僅
七年敗于漲水而故製迫陋亦令人意不舒常
平使者僚屬馮侯茂恭攝守一新大之侯故家
子學古入官慕循吏名迹欲與相角剪弊剝蠹
禁蕪繩暴率之以正行之以公持之以果輔之
以明政大事小節目具舉舊爲害最甚曰益昌

軍食歲三千斛郡亦二千八百餘斛廩粟又八百斛盡取之民不得一錢與常賦同輸其本費或計司指空文或屬邑侵幹侯悉條請之嚴絕之郡自任責會朝廷遣郎官出使大革苛歛即䟽始末又別具民事九蘄必更張是皆久且著因仍莫問者五邑歡震釋苦得樂而堂方告就侯曰前守監民苦樂在此榜不宜易也郡人則相牽連求聲詩於王某故作四章章八句

隆然新堂治所中間江嶺環匝州瘠以寒吾氓蚩蚩吏有奪欺侯登新堂來輯來綏新堂隆然

侯遠近望力紓吾氓俾獲其仰向瘠吾與食
寒吾與續導爾嬉娛廢爾悽悵堂富衆產左右
後前沼魴嶼鳥春棠夏蓮莫莫者葛蔭五畝餘
爾動爾植其寧爾居侯譙新堂賓僚接席觀者
墻立垂髫戴白歌鐘旣合手之舞之祝侯壽考
與江嶺期

銅馬歌

郛城村民鑿古墓隧得一銅馬高三尺許制作
精妙前簡池守景季淵取以歸中宵風雨輒聞
嘶聲恠之不敢留移送佛寺紹興丙子予以事

至成都黃伯淵見索作銅馬歌

君不見武皇逸志凌九垓追風躡影思龍媒魯
班門外立銅馬天厩萬疋皆塵埃又不見伏波
將軍破交賊歸來殿前獻馬式據鞍習氣殊未
衰想見老子真矍鑠兩京翻覆知幾秋只有山
河供客愁孤煙落日蠹叢國出此神物於荒丘
千年黃壤誰作主猶把歸心泣風雨但恐一朝
去無蹤有似豐城寶劍化雙龍

葛仙化

王勃故事詩人
未有及之者

靈山信多異孤起一萬尋其上羅諸峰聳秀欲

相臨危磴巧盤折古洞闕清深叢木開錦帳飛
泉鳴玉琴三仙班龍駕長往無歸音高閣儼像
設霓衣紫霞杓故知飛昇骨借來幽絕岑聲利
豈不好奈此老境侵吾家窮子安登覽動悲吟
盛時亦去遇忘大力叵任今人已笑古後人復
視今天命儻可順吾將守素心

大隋山

天彭對峙關兩門群山左右爭駿奔金城中間
作几案大隋踞坐何其尊境勝地靈誰敢宅古
佛來自東家村結茅三間初未暇一庵聊寄枯

木根緇徒駢擁助薪水王侯漸次迂華軒翫月
峰深崇棟宇瀑布巖冷清心塊至今西南推望
刹十世說法雲仍孫病夫垂老寡所嗜獨於要
妙欲細論當時戲出隨他語坐斷報化轉乾坤
邇來衲子多異解白玉面上加癡痕山蔬煮餅
姑恣飽雲氣漠漠連黃昏空堂附火耿不寐聽
徹猿鳥迎朝暾

曲尺山雲居寺

道方長老玄蚤來鍾自
鳴者三極異之因引仙

都鹿事求
一言記之

循溪上坡坵溪亦因山曲行盡高深處招提隱

山腹往者灰燼餘白塔但孤矗十年關斤斧有
此千間屋阿師笑相語異事子當卜今日鐘報
客振響非人觸病悴優婆塞歸夢到松菊諸聖
惠三昧警我煩惱毒卧聽夜雨喧起看曉雲族
去路猶恐迷主人費齋粥

讀王尼傳并序

王尼字孝孫洛陽之陷避亂江夏依荊州刺史
王澄貧無居室惟牛車一乘晝則子御之行暮
則共宿車上澄卒荆土饑荒尼不得食乃殺牛
毀車煮肉噉之盡父子餓死初葛雉川至洛陽

見天下已亂即避地南土董養至洛陽見二鵝
之孽即挈妻入蜀當是時天下則有亂矣洛中
尚無恙也而二子眎之若檻穽然拂衣徑去治
退居之計使尼先識如二子安得奔走紛拏之
際爲飢死鬼乎予感之作詩以自箴

處世常多憂政坐口腹牽誰能百無營飲露如
寒蟬原野足餓殍山澤漫臞僂作計苦不早身
窮乃怨天劉石擾河洛孝孫方南遷庇無一區
宅耕無一畝田牛車不自救枯骸枕道邊君看
董與葛見幾預著鞭智慮故不同禍福仍相懸

關輔已荆棘江淮復戎旃吾生亦可料速辦買
山錢

風蓬蓬一首贈范德承

風蓬蓬兩率率客子中夜寒侵骨青燈也解照
孤愁歸夢不到涪江側晚來天氣猶未佳萬里
濕雲遮日華僧房僻寂無來轍踏遍長廊占晚
霞聞道比鄰酒初熟能來澆我空洞腹爲君痛
飲不苦辭世路紛紛蠻與觸

贈王先生

并序

夔州王道成先生舊射利江湖間政和丁酉遇

異人王鼎傳內丹之妙遂破家學道浮遊東西
蜀鼎時見荆南市中不與人交一談無能識其
誰何者身長七尺廣眉目美鬚髯狀白如四十
許荆南父老自成童時蓋已見之一日與王飲
自道姓名曰吾洛人武德初事秦王爲御者奔
走兵間後得仙法隱華岳酒酣別去不知所往
紹興六年道成見予於金川講宗盟之好爲作
詩百一十五言

隴種健兒鬚如棘幼事秦府持鞭勒戰塵撲面
心已灰徑上三峰弄泉石乾坤變化五百年人

間未識地行僊布裘落魄荆州市丹經秘法爲
君傳散盡千金何所有腹中氣作蛟龍吼功成
直欲凌紫虛尚愛岷峨山下酒年來我亦厭樊
籠乞取微言爲指蹤君不見葉縣雙鳧緱嶺鶴
古來度世多吾宗

前年一首投贈劉荊州詩

前年別公東南馳正當六駟還宮時都人懽傳
好消息慈寧首問公何之羶裘不復恃軍馬穎
上一戰中興基青天白日呈萬象向來讒吻真
成癡數從西府伺行李樞莞政要人扶持吳江

再見丹楓落寧料我公猶在茲呼鷹臺邊閑鼓
角望沙樓上陳書詩夕烽平安置莫問賢牧自
當十萬師維昔全荆號強國近者賊火仍瘡痍
形勝之地勲名集端使前輩相追隨襄宗依劉
有故事自憐遠去作兒嬉明朝爛醉沙頭酒不
管春風吹鬢絲

贈趙當可

元子稱漫浪嚴生資苦勁海內無賞音秋風入
裘鬢東江一茅屋但欲安性命頗怪澤畔翁煩
詞寄天問

晚交得王孫每見心輒醉平生虎豹韜近者詩
酒累流光迫壯懷撫事我亦歎不如從君飲此
外淡無味

張元舉惠江南李王帳中香

西樓北苑春色濃日日醉倒駢齒翁歸來萬事
不整理笑倚娥皇冰雪容疊牋共寫霓裳譜更
作新聲邀醉舞瑤光殿裏帳拖紅一尺爐煙日
亭午事去時移二百年金陵空有舊山川此香
那得到君手妙訣無乃當時傳慙君爲我供愁
絕年來辦得心如鐵但能飲酒讀離騷竹枕藤

床卧明月

范元通見和仍邀再賦

新橋酒作琥珀濃平生頗羨江南翁扁舟尚繫
清浩尾却對爐香開病容何必探囊尋舊譜一
見詩筒喜欲舞竒芬麗句兩爭雄蘇合芝蘭謾
旁午當時俊氣輕百年嗟嗟百年間齷齪父老
何足問李王詩也而今悲逝川得公操筆弔興廢定知詩興香俱
傳我生自是癡中絕懶學諸儒議鹽鐵枯腸空
洞費搜尋兀坐忍飢三百月

李彥澤從余求衛公兵法

衛公少時已知兵坐談壓倒韓擒虎一朝委事
虬鬚帝南殲荆盜北鋤虜出其緒餘教君集猶
謂四夷莫予侮乃知機略妙無比攻城破陣一
仰俯當時傳公挾異術雲侵孤虛自默數可憐
癡兒尚詭恠至作齊東野人語我家舊畜公遺
書片段飄零十得五開囊收拾送君讀想見明
窓口如鼓玉輿消息渺吳越鐵騎縱橫暗江浦
學成出去清胡塵莫道儒生不能武

得孫以詩邀立夫兄次明文作看客

我生苦不諧所向如登天老眼始見孫便覺了

世緣一陽謹初度剥極宜復旋神氣已秀發玉
虹照晴川家書或有託似能守青編免翁費十
牛令渠受一廛使君與別駕同是峨眉僊肯來
摩其頂飛蓋相聯翩丘也親抱送已輸徐氏先
游夏實高弟庶幾文學傳

汴都二相國祠世多携小兒拜謂乞靈即游夏也

次韻子春

微風度疎竹青燈照孤影起尋千載書坐對一
夕永念昔走京師噉蔗入佳境注傳擬杜癖說
詩配康鼎詎識豹霧深但愛虎文炳薦紳滿朱
紫人物稱袖領經義有寸長富貴在食頃彈冠

欲慕貢洗耳寧思穎自從鐵林騎來污金華省
幾年強求活百事付幽屏慵便塵柄閑病怯牛
衣冷借書試探討掩關謝馳騁新聞渺無得舊
學粗可整鈇筆伴曹褒蠅蟲欺王猛自憐亡奇
者才拙乃素稟擔爲漫浪叟畢此須臾景外沉
豈殊致行止貴深省嘉言誰起予虛心期一請
宿毗沙院諸友相送

出門風喧號半道雨飄洒行役已堪厭投宿小
蘭若葱籠林樾中一徑僅容馬古屋數十椽佛
事走村社王趙兩故人清詩壁間寫讀徧已曛

黑尚有相送者見可逞雄辯
譏譏欲脣哆伯威
弄長笛哀音振原野子仁喜捷敏
德常號醇雅
來共一夕寒罇酒肯屢把
明朝定西去山路泥
沒蹠此地當回首想見煙蕪惹
平生受性僻所
至徒侶寡因詩記離憂
踟躕孤燈下

戲王和先張齊望

王家二瓊芙蕖妖張家阿倩
海棠魄露香亭前
占秋光紅雲島邊弄春色
滿城錢癡買娉婷風
卷畫樓絲竹聲誰似兩家
喜看客新翻歌舞勸
飛觥君不見東州鈍漢
髭半縞日日醉踏碧雞

三井道

次韻韶美義夫兩家舉孫

兩翁連詩軸誇我新生孫種德固有後擾龍同
一門祥應偶然耳矯激笑劉昆要令百世祀那
止一飯恩遙知湯餅局歡傳溪上村茅堂滿賓
客秫酒對雞豚我亦勸兩翁自放琴與罇此生
復何事醉吟閱朝昏

次何子應登賦樓韻

使君來作牧衆若倚南山時節當授衣已念赤
子寒駕言出登眺豈爲景趣繁民風指顧中惠

術良欲殫紆懷有佳句伏誦一再歎從今安田
里不度百牢關

以朝雞送樊氏兄弟效魯直體作兩絕
平生自許屠龍學歲晚擬作祝雞翁長鳴分送
君識取膈膈膊膊風雨中

塵柄知君談亶亶雞群笑我喚朱朱曉窻試渠
作人語絕勝蠹簡用工夫

頤堂先生文集卷第二

頤堂先生文集卷第三

姪

古詩

李仲高石君堂

三吳黑風吹地拆太湖浪高一千尺龜鼉兩山

壓湖心歲歲飛濤恣衝射山骨雖堅亦破碎穴

穿根斷瑰竒出二山在太湖古來石品稱上首

羅浮天竺乃其乙樂天作竒章公石記云公嗜

浮次之天竺又吳蜀相望天東西而從何處得

此石初逢頗驚醜恠狀徐視不見鐫鑿跡月暗

煙昏鬼神怒沙平草短俊猊擲或云王孟竊據
時曾是宣華苑中物英雄敗滅化爲土獨此頑
然蒼玉立流落幾家到李氏命名以君相主客
爲君榜堂詫鄉人愛賞不啻連城璧金璫中官
來奉使一時氣燄手可炙利誘威脅擬奪去仲
高誓死君之側先世所寶吾敢墜貴人縮首三
嘆息會昌丞相乃遠祖嗜好夙有煙霞癖平泉
山居付夢想石上刻字空照日朱崖精爽雖可
畏洛陽群盜旋充斥故知幽勝豈易保天公似
向人間惜

衛公平泉石皆刻有道字平泉詩序曰後世以一石一花移他處者非李氏

子孫然唐末竟為有力者取去五代時張全義
尹河南監軍者嘗得平泉醒酒石衛公孫延古
託全義求之監軍忿然曰黃巢亂後洛陽園宅
無復能守豈獨平泉一石哉全義嘗在巢賊中
以為識已奏荅殺監軍令政須洒掃堂上下置
酒招我無難色酒闌氣壯拂衣起摩娑石君話
疇昔

招隱亭

層崖壓西城半空矗孤峭何人結斯宇想見曾
次妙叢林開蒙密江山得樞要拂拂幽草香噴
噴群鳥叫我作謝公屐來學阮生嘯披襟待涼
吹停盃延落照永嗟區中人嗜慾昏九竅誰賦

招隱辭此病政難療我亦裹青衫俛首入選調
平昔志萬里自省成大笑才術幸無取曷不返
耕釣雄飛或有時一拜蒲車詔

任氏園二詠

驚遠樓

世論尚迫隘吾道亦摧藏行歌碧雲暮坐怨瑤
草芳不如寄層梯轉盼盡八荒飛霞曳爲裾明
月綴爲璫舉手招盧敖振步謁紫皇歸續大人
賦一笑遙相望

舫齋

平生江海志煙雨一莎衣掛帆恨不早白首心
事違作齋跨幽塘想像未覺非時傾半罇綠自
釣尺鯉肥蘆花卧秋風柳帶搖春暉寄言宣城
守何必天際歸

王氏碧雞園六詠

露香亭

北渚一帝子洛川一宓妃池有十種蓮平生所
見稀纖穠各態度紅白爭光輝我來亭上飲夜
久未忍歸翁家採香人但愛香滿衣豈知清露
濕圓荷瀉珠璣

鈍庵

俗子如錐利達士如椎鈍乘除付造物多智反
自困君看庵中翁漫浪出方寸卧聽松聲老行
觸蘭芳嫩謀身固未快事過了無恨今人豈辨
此勸翁慎勿論

清室

碧雞古名坊奔騰車馬塵那知小洞天清絕欲
無鄰一室對林樾四時禽語新焚香讀周易意
得氣自伸明月落盃酒冷風弄衣巾寄言朝市
客聲利恐汙人

鑑泉

分來何處泉注此團藥池有如大圓鑑玉匣初
開時瑩然絕纖埃萬象見毫釐主人湖海士曳
杖日娛嬉應照兩侍女新粧弄妍姿亦復照主
人鬢髮白絲絲

涼樹

窈窈林影深澹澹波光冷異哉濁惡世有此清
涼境側身朱欄上風煙得幾頃嘯聲出奇響疑
在蘇門嶺荷氣迤遙馥如窺太華井要須從翁
遊岸巾閑日永

層蘭

僊翁有蘭癖肆意搜林垆負墻累爲臺移此萬
紫青九畹與九層異世皆可銘取拾衆妙香道
遙醉魄醒隱几光風度開簾皎月停門前勿通
客翁續離騷經

宿崇德祠下望青城諸山

昔年來就學頗熟青城面雖無尋山分猶喜旦
暮見違去八寒暑夢想無時休誰意俗士駕復
作山下遊晚雲蔽高峰悵望久柱頰山靈豈猜
我未許相投接晨興雲散盡秀色轟亭亭還如

故人眼不改舊時青愧非自由身又復塵中去
他日訪麻姑問評山頭路

淨明長老睡庵

阿師睡三昧有如飽葉蠶以睡作佛事復名所
住庵夢覺本何擇月行影在潭勿笑脇尊者二
子正同參

懷安光孝寺觀空軒遺圓長老

寶坊鬱鬱滿松檜獨有小軒花數輩勝以觀空
作正觀要識轉物大三昧世間眩人萬紅紫心
君已落色界內那知心境無異法真見元非色

塵外色空雙忘未奇特非非想處亦橫潰誰因
拈花發微笑嚼藥嗅香不相礙吾儕跛鼃望千
里安得還都如歷塊詩成懷藏擬不出彼上人
者難酬對

置酒登賦樓觀月立夫有詩序列次韻
西山自高爽更上百尺樓月華出萬象獨以寸
目收寒光增灝氣山影接江流相從更幾日醉
賞同一甌諸君有大志應銷別去愁衣食纔足
守墳墓記取龍鍾馬少游

九日同韶美誼夫登妙明分韻得光字

野迥半留日雲薄初護霜一傾萸菊酒三肅翰
墨場諸君黨友賢獨我鬢毛蒼滿引雖云樂分
携亦自傷平生子劉子趣歸謁建章勲業定指
取富貴肯相忘古人重佳節酬酢無餘觴龍山
丹葉飛騎臺白草荒但使修名立豈識離緒長
明年未可料共飲西湖光

呈蘇企道漢良呂默夫

半生岷山下心與岷山親幾蠟登山屐不作山
間人茲遊愜所願晴暄送餘春山意欲相招縷
脉就我陳同行二三友懷抱無一塵久矣煙霞

癖佳哉笑語新歲華迫人老世故遣人嗔努力
造窮絕樂事當及辰

次韻李士舉丈感春

四時平分春大好春雖強半未甘老輕車矮馬
恣搜尋始信天工爲春巧中園層層亂風花長
路青青被煙草詎知陽熙變陰慘頓令樂事成
憂悄兒曹浪語甜如蜜欲觀俘囚數軍實黥黥
萬屯移蜀塞胡人喜躍秦人泣孤坐唯防酒醖
空餘寒頗覺鷺聲溢貪嗜五斗不自謀幾時歸
作山林客

宣撫招討公取德順張形勢欲吞全
陝功將成矣聖主念兩國赤子有詔

頽師移屯蜀口憲車李丈
感春有作某次韵及之

次馮申之遊靈泉韻

名山起高興不惜馬首東沙邊一着眼翠光已
浮空踏遍桑柘村所向漸不同溪細山疑合谷
轉路始窮瑩淨白玉界芬馥青蓮宮元知境過
清乘春乃昭融尚餘半殘花伴我酒頰紅拂石
愛少藪披林怯多風安得身無事來對禪寂翁
慮沉燈影外慧發鳥聲中庶遂老巖壑此行太
忽忽

李安撫生日

沙溝紫氣如隴雲涇城冬律變陽春天工爲國
巧謀帥生此標標七尺人坐揮白羽歷三紀胡
兒奔迸塵頭起緩驅小隊來漢中甲光冷射清
江水金爐著火焚寶香願公壽考仍康強門外
祝公更多有軍民十萬指中梁

范潛生日

治忽本天運賢哲豈浪出中興信可期帝爲賚
良弼嶄嶄岷峨山西南著第一山靈借英氣成
此垂雲翼才多浩江海道大迷畛域磊落萬卷
腹爛斑五色筆曩參相君幙謀入九地密復佩

太守章化行千里溢紫詔從東來界之使者節
旋兼蜀大尹繡衣擁彫戟談笑百城聳指顧萬
事集但恐被賜環台袞輔王室有如老忠文殊
勲照簡冊佳時過重五適當懸弧日遠邇析公
壽歡聲共一律伶俜涪江生獨以文爲業不敢
嚴香火不敢具芝朮拂拭舊破硯曾次先窆元
公掃河朔塵請飛聊城檄公蹠定襄血請勒燕
然石待公黃髮年几杖付閑逸從公綠野堂哦
詩繼元白

中秋大雨

癡情愛佳月樂事期中秋造物故相戲不遣金
波流玄雲如塗墨急雨欲漲溝暝色暗無際壯
聲浩莫叔揖謝雲雨師努力勿罷休歸來坐書
室盃酒自獻酬

遊空山

閱遍平川至山足投鞭下馬緣山腹古栢屹如
蒼龍起絕磴盤作長蛇曲氣力已憊意未歇市
聲不到境尤肅欵門徑謁紫金像邃殿蕪蕪來
香馥褰衣却上清虛閣叢林障我千里目嘉名
大榜起何人來者先自嘆煩促時於缺罅見一

一煙江黛嶂堆青綠先人昔此斷還往三年學
古忘幽獨當時詩板今無在只餘石刻記經軸
拂塵再誦心欲折世態萬變流光速我方投迹
隨喧闐文字堆床未盡讀山中宴坐亦所願那
得寬閑繼前躅留連兩日同僧飯更念重來幾
涼燠作詩強寫無窮悲天風爲我號寒木

遊雲靈觀

茲山雖特起遠窺殊未豪三休出雲際始知盤
踞高大江分一綫衆峰環千遭溪谷粗可辨綠
樹皆蓬蒿羽衣何年來釣取海上鰲盛衰伸臂

頃古屋風颺颺元和有遺刻雙旌挾時髦想見
飲清曠秀句含春醪萬世同一元名字空嘈嘈
吾其鍊僊骨玉京摘蟠桃

遊靈泉呈性老

曉發雲靈山午憩靈泉山兩山信有靈相對各
開顏阿師達麼孫文字昔所刪戲出香積供憐
我半生孱時維春物老餘花見班班杜宇鬧蒙
密胡蝶舞清閑大似師說法奧路關重關市區
巧攘奪日中誰先還請以一枝筇從師兩山間

再遊雲靈

生緣墮城市日與塵埃俱豈無青霞志不得閑
須臾李君實吾黨半歲相招呼今晨始能來
汗先霑濡奇峯出天半虎踞東一隅絕頂所見
異衆山巧奔趨危坐送落日萬象爭環鋪隱公
老益壯我亦窮而迂同行二三友文采得自娛
少待月波上歸騎當徐驅醉中語黃冠此心何
時刻

遊樊氏阡分韻得事字

山深少車轍雨餘多空翠不知窮秋中草木乃
爾媚隱君一坯土諸子幾掬淚盛年喜邁種末

路等幽閔村酒敢嫌濁喚起吾渴睡勿聽松風
哀姑對山月醉從今棄書冊獨以醉爲事不然
持禿簪淨掃清涼寺

再次韻

寒齋編簡香溫室紈綺翠疇昔徇所好外物巧
相媚晚驚生死變洒盡闌干淚誓求無上法不
問天所闕休悲夜臺客萬年供一睡我亦老將
死何苦逐昏醉歸從浮圖師了此一大事試問
八督州何如三入寺

閩州新井縣豐山鎮慈光院殿柱有咸

平三年寇萊公書海棠花絕句云喧風
花雜滿欄香盡日幽吟嘆異常翻笑牡
丹虛得地玉階開落對君王近歲邑令
剗取墨跡寘邑之廳柱今獨石刻在

荒山古剎殿柱頭萊公題詩說羈遊當時海棠
不擇地有似野水橫孤舟澶淵功成返黃屋東
府夜宴燒椽燭老向雷州著綠衫蜀芳剪棄吳
舡覆一驥向來超萬群誰與九原呼相君天寒
酒淺不供醉卧看北風吹陣雲

大雷雨中舟過蒼溪懷杜子美

疾雷欲破嶽疾風欲翻海昏昏雲氣中稍辨
蟲鬼飄雨雜飛雹蓬屋響珠琲舟子紛相呼
篙入旁匯罅漏何所避庶幾無大悔萬鈞寄弱
纜掣斷危可待過午天氣佳起視江浼浼書生
強遊行有神司其罪不見少陵翁蒼溪遺句在
我老更可憎比翁窮十倍

次韻次尹俊卿梅花絕句

人間幾桃李漫漫化泥塵不恨叔功晚新年第
一春早

飯顆從嘲瘦湘流獨占清失身到東閣聊復對

簪纓官

未學迴風舞初成拜月粧故令青女妬一夕月

階霜月

惡霰爭璀璨僊標不解寒漢家趙飛燕偏許雪

中看雪

雲澹江臯晚飛香到短蓬望窮渾不見恨滿白

蘋風江

袖寒倚脩竹暗起著人香聯影黃昏月亭亭上

壁璫竹

雖無適俗韻亦有可憐香定自嫌朱粉翻成點

點黃黃

墮蘂香猶嫩空枝影半橫江湖無限思不獨為

尊羹落

往成都八客錢飲得同字

鎬京有八士淮南有八公紛呶一夕醉緬邈千古同我思錦江曲駕言涪水東神交設華宴妙語穆清風合坐燈炯炯投曉山叢叢別去復何道勿使酒盃空

與諸友遊楊氏池上呼王隱居小飲晚
登書臺

微風度竹氣澹煙增樹色探尋得佳境澹澹一
池碧藻荇紛縱橫魚蝦時跳擲同遊好事者喜
我有此僻置酒助清賞環坐藤陰側白鬚比鄰
翁恠語不自惜欲學三盃醉相付一笑適酒罷
循歸途翁亦返舊宅

臺山如招人突兀城南隅我來有佳興不辭石
磴紆步窮孤絕頂局局萬丈餘永懷舊刺史儒
冠此研書竟以印綬歸榮光燭鄉閭世事幾反
覆百年等湏臾地閑芳草積樹暗怪禽呼空留
好書名永與此山俱

原闕

頤堂先生文集卷第四

姪

傳

編

古詩

山雞送范元通

我離別曾文字子所負騰踏會有逢勿使豪邁
氣衰颯隨霜蓬或歌歸去來徒爲白髮翁男兒
富事業高名配華嵩

送雍堯咨遊青城

曾遊玉壘市長揖岷山雲塵緣不暇往今日離
送君文人紫霞服麻姑青練裙鹿車時出遊俗
眼了難分獨聞老人村鶴髮自耕耘豈無抱德
士可與立奇勲勿求不死藥自苦骨與筋胡兒
正南牧兩河如聚蚊

送胡康老

胡公起三晉才如山河雄弊裘走上都氣壓洛
興嵩豈無濟時策入對明光宮戰塵一飄蕩隻
影隨踈蓬虎符靜爲治使節凜生風所出毫末
耳照眼驚兒童竭來墮閑冷玉匣藏霜鋒忽買
巫峽舟飄飄指吳中遙知遷擢近黼坐思募龍
他時卧華省清夢來巴邛

北人事鞍馬笑誇太行高豈知相風色孤帆寄
江濤雄圖攬方寸不憚舟師勞一見武功天騰
踏當有遭皇綱餘絲髮海宇半弓刀誰人念恢
復此事付英髦葦羹伴鱸膾酒舫載蟹螯何如

歌羊酪春醅潑蒲萄願言雲路穩勿使閑豹韜
功成儻乞身故園剪蓬蒿

送普州守

寧可鈍如槌不可曲如鉤毛銖夸爭奪所喪乃
山丘向誰巧相中機筭險且幽十年彈指頃死
骨埋荒陬細看天定後人力豈易謀一洗謗書
毒近鄉仍典州惟此詩書窟俗比魯與鄒老手
亦何事坐嘯群吏休政成有異等時至或封侯
期公如鐵山屹立千萬秋

用舊韻送普守赴闕

園墻閑木索南畝富鉏鉤人謂賢使君治術本
軻丘丹禁頗念遠白簡頗黜幽那知牧養手安
坐窮山陬國是久已定諒非卿士謀除書下八
行仁風被九州自憐登門舊長裾曳齊鄒送公
朝帝所別語不忍休腰組掛銀黃刻日賜通侯
應記遠宗子茅簷卧高秋

虛名強逐臭小智矜藏鉤鸞觸蝸兩角古今貉
一丘念昔齒方壯抱愁山之幽誓從東南尉策
勲西北陬人事乃大謬天命不少謀雲梯乏僊
骨車轍半神州廉頗故思趙韋孟欲徙鄒錦水

清堪濯草堂靚可休儻有一區宅不願萬戶侯
尚及公掛冠共飽黃雞秋

送何熙載之官鄰山因簡虞并父

力學取名第指作青雲梯向來杏園伴盛者直
金閨天工亦善戲淹速乃不齊三年得一尉初
挈孥與妻邑居大山底積翠蟠東西瘦馬當緩
驅石磴裂馬蹄寄謝循良守桃李想成蹊行春
有餘暇書尺到耕犁

効東坡送顧子敦體送趙子功令資陽
子功宗室雋一柱屹蒼蒼投身冠蓋窟所向率

披猖宏論震俚耳百川吸滿觴頗笑中壘尉豈
羨執戟郎胡爲學蠹魚夢入編簡香作字擬羲
獻賦詩逼齊梁茲行宰劇邑人謂挾風霜我言
百里小未得施寸長上司督租賦文檄日一箱
枵此空洞腹餘事皆糗糠耆舊王與董骨朽神
不僵努力肥百姓二子立道傍

同誼夫國才饒季然于普門院取壁間
五字詩各探一句爲韻賦五詩某得共
飲碧苔畔

投分前日歡愴別古人重相望一千里獨許明

月共

滿酌青菴盃醉卧白石枕借子驪駒曲侑我河
朔飲

暑塗勸加食養成摩天翻中車寶帶黃小隊油
幢碧

塵榻爲子下柴扉爲子開從今斷還往一室長
莓苔

來時金蘭集去日風雨散別語慎勿忘短書寄
澤畔

贈瑄上人

日日登南樓支頤望西山念我知心友一榻栖
孱顏詩如山中雲婆娑意自閑世無飛僊術塵
步愁躋攀我懶久不出碧蘇封柴關床頭五字
藁期師一來刪

諸公爭談詩健舌秋河傾袖手但兀坐欲語不
敢聲獨喜圓顱師嗜好與我并相見不言他古
律同細評愛惜丈八矛徐攻劉長城向人勿浪
出三年戒飛鳴

白髮潛庵老嬾近者焚翰墨長身書臺子潯江
湖斷信息肥宗弼與短演淙見面應不識桑門

減詩侶熟念氣填臆惟師兩無擇同我滯鄉國
努力事唱酬異時亦南北

送緣庵主

上人久習靜閉門守一龕猶恐市塵染西岷撥
晴嵐歸來非本心退結山中庵秋風入我袂又
徃天之南南方盛法窟誓志必窮探雙徑卧老
龍懷珠千丈潭東鄰嘯乳虎眼光見眈眈禮足
受半偈安坐十年參我昔客吳楚但愛雲水涵
不聞清廟瑟浪走雪滿簪相逢儻有日爲我舉
二三尺書附已使勿語洞庭柑

送元思師

思師講法華衆說積丘墳嘗據師子座受降千人軍猶嫌文字傳聖域未策勲欲唱江南曲試披楚塞雲良才大蔽牛匠者宜揮斤箭鋒或相直對面同一欣古人得解脫乃不厭多聞歸來閱故書請以道眼分

送智齊師出峽

齊師成都來春風掀竹笠自云十五年參學事未畢得錢買小舟湖南尋佛日曾中有此老如飯不下嗌誓竭牛馬走往供薪水役儻諧一大

事歸來卧蓬車此老吾所聞機用飛霹靂高提
倚天劒萬里無行迹師欲嬰其鋒意氣真絕出
巫峽拖聲轉湘江帆影急行矣毋滯淫坐夏猶
可及寄語花藥市爲我留一席

送疑上人成都看藥市

蜀山富奇藥野老爭藏收九日來成都塞斷長
儀樓權豪競奪去萬金未得酬問師杖頭錢免
渠失笑不久通安樂法況復形骸憂知師不應
爾肆意作嬉遊傳聞不死草往往落鉏耰我欲
前市之請以道眼搜屑屑治編簡一室方自囚

世塗敗人意寄語韓伯休

送性上人

錦官與子別六聽秋城砧坐纏兒女愛夢遶蒼
葡林子歸能幾日又起江湖心江湖多幽寺老
衲天機深一言當有契超諸去來今孤舟出寒
渚停雲結層陰滯留嗟我老何以開愁襟

送譯上人出蜀

夕雨敗沼荷曉風獵巖桂人各動歸思子獨謀
遠逝峽門去來舟日爲聲利計扣舷數得失子
獨尋師銳徑山天尺五披光出蒙翳雲居接廬

阜薦福踞鄱汭維此三大老從之可卒歲玉泉
亦清冽縱飲爭挽袂南極百十城一一盡所詣
寧使蘭生足肯畏雪封砌更憶大瞿曇捐身求
半偈

聞佛日無住徑山正庵無住薦福
意頗欣然雲居謂賢玉泉謂璉

送楊道者永覺

久修頭陀行但欠僧伽衣胡爲走紅塵浣面不
忍揮忽覺東州夢又指西山歸九峰富泉石百
里環翠微買山吾無錢亦解守釣磯兒女苦牽
挽此身陷重圍臨分一太息山中音信稀

送洪上人遊南

中原百川赴東西萬折惟有蜀江耳師之桑梓
江干側扁舟却訪鴟夷子荆楚吳越我未到每
聞談者亦自喜羨師脫去事幽尋春風滿帆作
行李會稽草木朝霞蔚錢塘波濤夏雷疾桂樹
楓葉怨楚人尊羹盞豉詫吳客到處定知有新
得長篇短韻揮掾筆他時我亦探禹穴一見名
字如促膝

送南平僧歸里

牂牁水闊雋山高什教君長曾紛搔時移事變
今安有百里相望皆城壕我住涪江一區宅頗

恨長安遠如日聞師鄉邑愈更南不覺掉頭三
太息送行且學浮圖語是身於世真逆旅胷中
穩處即吾鄉交益誇辭空自苦北風拂面寒颼
颼遙知去路雪侵裘忍飢奈凍得嘉句好在濡
筆傳中州

送演上人

整整袈裟團團笠覆此短小精悍質誰知意氣
解摩雲著對諸兒戀鄉邑江南蕭寺不知數據
堂說法盡龍虎只應飽取一味禪斷却從來巧
章句晝短天寒無定程孤舟尚倚裝齋輕玉泉

度歲亦良策好在沙頭春水生

送月上人南遊

錦官東郭大蘭若眼明見子長廊下春風二月
白帝城一笑相逢手重把羨子遠引如孤鵠願
我低摧真病馬碧山紅塵不同調底事曾懷兩
傾寫幽尋勝踐我亦喜夢魂已落瀟湘野扁舟
躡子尚可期幸有此身閑似社

送祖月上人

月公別我浮三峽欲往南中求大法此行初爲
梅州老過嶺障煙恐難狎掛帆且指古鄱陽驥

子鳳鷄亦稱甲十年故人我尚記平視諸方氣
嘗壓玉劒無聲血千里肯就銅盤後先軟相從
學道須究竟半字落耳汗霑洽宗師語言豈不
佳世間傳寫空盈夾歸來趺坐舉其要莫話衡
廬與茗雪

題趙德脩所藏孫太古尹喜傳道圖

大栢森森護盤石老聃踞坐三人立盛德之容
本和豫漠然不應豈真實歟者隱奧九九篇纔
示指畫意已傳細看尹喜磬折處金篴刮膜見
全天侍旁二子來何許無乃徐甲庚桑楚注目

拱手氣不吐畫師筆端更解語函谷關廢河水
黃授經臺傾隴草荒一幅東絹吾無用要逐青
牛歸帝鄉

題何朝中所藏趙邈卓饒虎圖

何日老於菟失脚來空山山中無所食瘦骨見
孱顏舐掌鼓餓舌始信擇肉艱姑求一飽計未
肯藏榛管畫師有深趣粉墨不可刪獸心察凶
毒人事戒防閑編鬚固莫敢強弓亦徒彎吾命
儻足惜斜陽掩柴關

題馮申之所藏徐皐魚

菱葉蘋花點水面水淨如空到底見大魚獨行
示閑暇小魚群嬉誇敏健畫工定自知魚樂掉
尾揚鬚固多變猶勝圖寫吳王贈戕滅衆命供
一饌南唐徐白稱絕筆臯實同姓最後出三幅
掛我素壁間恍然又作江湖客吾聞神物久當
化煩君謹護風雨夕一聲霹靂飛上天回視丹
青了無迹

題游昭畫牛四圖

晴暘布陰來灌木村童地坐弄鸛鵒老犍食豐
草側身顧其犢鳥跼跼牛逐逐無人見此春綠

游絲如許長翠影落橫塘吳牛最畏暑賴此五
月涼想見下飲時不念芻菽香搖蕩水生痕淩
亂日浮光可惜蓮與蒲勿涉水中央

山平臯隴低秋深雲雨晦牧人荷蓑笠匍伏在
牛背犂牛先跳逸兩牛追不及安得青天出白
日重來緩驅莫相失

雲蔽天雪欺樹山徑之蹊斷來去飛花撲面朝
風乳兒把牛索藏短袖擁鼻衝過縮其脰茅蘆
咫尺且忍寒兒歸附火牛繫欄

題王逸竹溪釣艇圖二絕

斷岸竹如雲翠色落寒瀨艇子何處歸應轉煙
林外

塘影抱林光樵風接溪浪最愛筍蕨時恰是河
豚上

題政黃牛出山圖

政高僧平日騎
一黃牛信所之

眼明雙白鷺身穩一黃牛玉轡章臺陌可憐供
百憂

橋邊路欲迷林外山猶見長歌扣牛角不讀項
羽傳

題十二溪女圖

霞珮綴仙班
春風擁驂驟
應無世間夢
悵望碧溪灣

題昭君圖

朔風吹鬢影
猶抱琵琶立
胡兒在何許
邊頭羽書急

題蒲公所作陰壑生虛籟

積霧瑣空巖
寒飆振疎木
遊子勿言歸
山程太幽獨

題蒲公所作月林散清影

暝色兼荒遠
初分浦溆煙
應知漢江珮
月竹間

娟娟

題榮首座巴東三峽圖

白帝城高鼓角罷巫娥廟冷雲雨空只知楚塞
明雙眼不覺神遊尺素中

題李伯時渭城送客圖用知幾韻

龍眠幻出摩詰句想見落筆懷抱空只有古今
情不盡渭城楊柳幾春風

題雲月圖

王賓王畫峨眉月巫山雲二
圖仍大字寫太白詩李久善

亦大字寫子美
巫山詩附其下

萬里峨眉夜夜月千秋巫峽朝朝雲詩句丹青

共摹寫筆端三昧要平分

菩薩巖前淨滿月神女峰上光明雲吾人肺腑
中流出詩句丹青無半分

題南禪方丈壁

南金楚璞何施爲出門即取厚利歸古來乃有
金玉士抱冤碑兀人不知君不見呂侯大符誇
凌鑠車前打折麒麟角徑須歸去來一丘與一壑

題樊氏樓壁

老秋氣已嚴今日稍晴和登君樓西翼相對一
酣歌邊烽照仙關大將方枕戈吾儕無志用心

懽驥先睹強促半罇綠各自爭芳我月影漸騁
歸西山爽氣多坐興兒女念欲往山之阿諸君
祈努力吾亦假餘波

無題

桐孫枝有海潮音玉指初調萬籟沉燭影熒熒
鑽窻底此時端欲見琴心

送祖道師赴長江

山林與城市何地非隱淪子意亦易敗徑投寂
寞演楞嚴有奧章試爲識者陳歸思落煙艇尚
及秋風新

顧堂先生文集卷第四

頤堂先生文集卷第五

姪

近體詩

次韻大受登正法塔見劉王二陵

試縱浮圖目閑舒客子情軒騰超世界指點識
鄉程天大雲歆野江蒸氣抱城長風饒振薄落
日倒光晶古色千年在悲歌百慮盈戰爭初自
苦成敗幾堪驚狐兔穿蓬顆珠璣入里垠劒關
猶北向巫峽只東傾往意增三嘆餘蹤付一瞠
誓言逃俗網碧海跨飛鯨

次尹俊卿見訪有詩次韻

聯驂來二妙契好屬兒孫夜半星河轉談深几
席溫能詩飯顆瘦使酒濮陽疏萬事醉吟裏那
須倚市門

次尹彥回復來偶予他出用前韻招彥回
往時傾蓋友前代湧泉孫肯念三年別能來一
語溫歲華斯老大功業付黥髡直爲詩篇好扶
藜日候門

東禪別新資官令榮安中走筆次韻

雖念三年別猶欣一日逢哦詩能淡佇作色想

雍容古栢耳秋雨寒鷄伴曉鐘歸塗莫惆悵喜

事見重重

是日安中得其家報愛婦生子

次韻李知幾

密雨連三日青天未肯開庭除舞蚯蚓几席上
莓苔又說邊聲急渾無鄉信來愁心似流水空
費寶刀裁

醉中走筆次趙彥和韻

三年相爾汝一語敢誰何有學窺黃老無心戰
外魔牛心應易敗蝸首故難磨不識王孫貴朱
門亦許過

拾諸公餘韻贈輝禪師兼奉荅勾龍伯秋

謁廣利輝禪師

引泉澆藥圃編竹護花科此古律字作頓喜高風
在仍聞密義多四山圍翠黛一水練青羅誰謂
幽師死來看牢堵波

舊飾蓮花座新繡貝葉科朝餐葷味少夜誦篆
煙多不執鐵如意肯偷金叵羅猶堪試綿力法
海激頽波

奉伯秋

要憑稽古力尚阻列僊科富貴終愁逼才名已

思多廟堂違故事經學到新羅拭眼看收拾天
池濯素波

荅伯秋

足爲春遊繭頭因午醉科神交嘗恨少詩債敢
嫌多幾日登廬阜他年夢苾羅故應三峽外漁
艇老煙波

芻蕘傳吉語詔旨緩追科疲俗今當復諸公衆
所多誰能齊卓茂我亦怖閻羅種德無餘事流
光付逝波

半生沉俗學中路墮嚴科白眼遭非類黃泉愧

阿多無勲封柱國有志粹何羅慎勿相料理因
風又起波

又和

性癖耽盃酒家貧廢臼科江山聊作助崔蔡不
須多早歲攬吳榜春風試越羅只今中夜夢突
怒見潮波

風來雲度屋雨過水盈科懶覺詩篇少閑看景
趣多垣間生薜荔床下長娑羅空法銷諸漏端
如迦葉波

可惜通三語相期中六科南司章奏好北闕檮

紳多想見趨宣室真成上鬱羅行裝宜速具未
用歎奔波

從軍思上策直諫赴賢科抗志吾何敢取功衆
孰多清詩無競病小令有來羅今日奇寒甚明
憲試偃波

次韻何子應遊金壁池

子應相招以
病不能出

柳樹濃垂岸荷花滿覆塘日供無限影風遮自
然香酒艷浮瑤席歌聲繞杏梁空慙長卿病不
作次公狂

景色遽如許懽聲阿那邊綺羅沽酒市然竹泛

花舡越客知何夕
壺公自有天
茲遊傾澤國
寧問壓巴川

次韻子應同遊靈泉

香火尋幽寺
麾幢度廣川
塢深斜透日
溪涸細流泉
玉粒新炊飯
金花側布田
歸塗動詩興
健筆寫江天

次韻子應遊鶴鳴

夕雨方開霽
晨雞亦罷鳴
四郊知按堵
千騎得徐行
再閱天章麗
還同佛日明
袖毫出佳句
壓倒謝宣城

次韻李士舉丈除夕

梨杖初防老桃符又換新驚回潼水夢喜見義
城春浪走何爲者流光豈貧人翻思大儺氏闊
步過天津

兒孫思故國詩酒送窮年祿近禾三百人慙貧
半千壯心非曩昔尊足幸輕便投曉椒觴盡春
風共醉顛

暗燈延鼠輩殘漏付雞人杯酒浮三酌蔬盤薦
五辛凍吟多累句孤坐絕來賓鏡裏星星髮平
明六十春

次韻呂閬州錦屏之集

飛簷依絕巘朱檻俯清流劍外誰堪似城南獨
占優濃春牽酒興勝踐與詩謀日落江煙起旌
麾更少留

次韻荅張迺直

才如北海豈云踈局促從來笑腐儒祇作文章
希屈馬不將門戶敵崔盧公車奏議三千牘京
洛風塵十二衢回首知君幾多恨肯甘華髮老
江湖

次韻許唐臣文

目斷揚州淚似江龍興半夜狩南邦徒聞四野
方多壘可惜黃旗漫繞杠濁酒有神磨歲月愁
山無賴入軒窗青萍三尺將生綉憤氣蟬噪只
自降

次韻任元受除夕

九重無路扣天關萬里何時返華門歲晚濃愁
催白髮夜來隻影落寒罇誰令興發水雲國獨
憶春歸花柳村知有筆端三昧力試將些語爲
招魂

次韻荅趙之源仍簡演師

年年春事寄征鞍一笑歸來已強顏但得從今
千日醉寧論自古四并難憐君不怕憑烏几願
我猶知愛碧山應許相携學寒拾同參饒舌老
豐干

次韻諸公贈將官度浩然

休把長纓便請行如今正屬恭階平醉看夜月
清罇倒卧對秋風白髮生羞向熱官稱命薄喜
隨寒士以詩鳴他年採藥鹿門去不許人間知
姓名

次韻馮舜陟見贈

梁山回首幾悲辛
來對江城拂塞塵
枕翹漱醪真下策
推書撲筆更癡人
如君自是聲華舊
及我相逢笑語新
便倒詩筒費褒飾
坐知搖落變青春

次韻趙當可

元禮門牆豈敢踈
擬題刺字拂塵裾
頽顏此去歌無奈
聞道從來恨不如
食蛤未妨期汗漫
椎蘆或可作蘧蒢
西園飛蓋成何事
要見枕中鴻寶書

次韻顧次鳳

筆端文字照千春
僊籍班聯透幾塵
黃卷肯交同長物
白袍未信異閑身
至言落落常難合
俗眼悠悠少識真
誰似江東顧夫子
月臺對影只三人

和唐山叟所贈三詩

人品相懸定幾分
十年高卧赤城雲
神仙窟宅古多見
泉石膏肓今亦云
羽駕擬陪天上樂
麟毫猶寫世間文
吳江楓落搖歸棹
更喜新詩憶所聞

蓑衣芒屨日相逢
仙者誰人識呂鍾
已受丹書

存夜氣定除白髮變春容情田舊習雖鋤穢筆
陣餘威尚折衝聞說山間賦招隱試披雲霧幾
多重

徧從江海濯清流歸老岷峨占上游心遠欲聯
高士傳地偏仍似賈胡留何時竹杖閑椿壁終
日繩床懶命儔碧嶂紅塵兩相望勞生笑我不
知休

次韻米太初

元知文采冠多邦牀下如今拜老龐短刃何能
排賈壘輕舸敢問絕潘江初聞毛穎抵供笑退

誦溪堂但乞降誰擬一臺稱二妙如公才氣本
無雙

和榮安中二絕

射洪春酒舊知名更得新詩意已傾獨與劉伶
敦契好山王不敢豈人情

醉來不入少年場只欲問塗何有鄉
旣酒王川
貧徹骨空將臯觀到糟床

次昭覺圓老韻

丈室曾窺金錫光汾陽宗緒故應長不嫌俗子
堪傳授更借餘波到樂浪

次韻日新見招

聞道山中熟臘醅。懸知甕面喚春回。桃花亦解相勾引。前度劉郎擬獨來。

次韻師渾甫

五字長城久讓登。雲梯更羨最高層。別來大有離群恨。今日西南又得朋。

春愁早覺費驅除。清酒何人贈百壺。投老殘年無處著。只堪脫帽見霜顱。

次韻何子應留詩爲別

追攀筆墨幸同時。蘇季如今不願師。自詫柳州

曾指授年來稍稍許言詩

周南底事苦淹留盃水那容萬斛舟
穩駕長風歸去好鳳凰池上醉遨遊

邇迹韓門尚壯年老陪杖屨本因緣
早知決定書青史湜藉諸人繼有傳

出頭自合持文柄失脚因循作吏師
記取春陵好邦伯臨風對月有清詩

主領風光春復秋西山蠟屐北池舟
羲皇以上同真樂俯仰之間憶舊遊

蘭若生祠付百年曾將秀筆記夤緣
浩江口口

歌遺愛碑版懸知四裔傳

次韻鬼子與

清谿西岸作鶉居敢怨投閑百不如喜得君家
好兄弟相逢如對古人書

長貧我欲爲巴叟高詠君能繼洛生自許一丘
成小隱仰瞻千載立脩名

大晁富麗比南金令弟清新敵楚琳死却廬陵
老居士二蘇那得有知音

韓門今日有真傳興起斯文四百年可惜飛龍
卧荒櫪閑看翠翻落虛弦

新詩字字救朝飢仁義之言反類癡誰辦千金
取駿骨大勝列屋養蛾眉

再次韻

岷江劍棧揔寧居聞道邊頭亦晏如猛士雲屯
方賈勇胡兒莫送講和書

築壇拜將一軍驚初識淮陰勝下生能讀父書
成底事可憐世上逐虛名

懶擲麈踈地上金絕知環珮響璆琳歌功頌德
今時事側聽諸公出正音

佛狸已死北人傳虜馬飲江謠故年只有昭君

怨青塚他時心事付鷗弦

欲細腰圍強忍飢早知作計太憨癡從今百斛
收螺黛學取風流半額眉

遊靈泉次性老韻

醖裏濁醪無宿釀餅中脫粟有孤炊忍貧不徹
來投佛坐聽松風無限時

趙和之自鶴鳴泛舟歸城次韻

斜日撩歸興飄然李郭舟旄麾明兩岸管吹落
滄洲要與民行樂那須酒換愁遙知陶靖節臨
賦喜清流

趙成甫招飯次默夫韻

鳥聲呼客惡花影過簾遲
酒灑東西玉杵殘
白黑棊稍驚風弄袖
直恐雨催詩
一笑留歸騎
斜陽無限時

荅戴時行

如今四十已知非
誓學宗門第一機
養就純乾猶細事
直須空劫問音威

佛祖由來命脉通
大千世界一光中
藥王菩薩知君是
乞取刀圭救病翁

荅李知幾

原闕

明柯維騏宋史新編藝文志載王灼頤堂集五十
七卷絳雲樓書目雖列其名不著卷數讀書敏求記
則曰五卷王灼字晦叔號頤堂遂甯人隱居不仕所著
有頤堂集碧雜雜志糖霜譜未嘗記及書之源流其失
傳久矣此本亦五卷豈即遵王舊物耶光緒丙戌猶子
立誠下第南旋得於森漱六後人處歸而呈之先兄
數為未見今兄歿已三載余適病起展誦斯編不勝
對牀風雨之感庚寅九月丁酉